

Exitoso programa di Pascu den Club Bonaireano

San Nicolas, 24 December.
Diamars 20 di December a tuma lugar den Club Bonaireano e ultimo acto cultural pa e aña 1963 den e club menciona, Sr. John Hart, maestro di ceremonia a jama tur presente bon bini y despues a pasa palabra na Reverendo Pastoor van Baars kende a duna un MENSAHE DI PASCU. Pastoor van Baars entre otro a pidi Paz na mundo. E Niño a trece paz pa tur esnan di buena voluntad. Pakiko no tin paz duradero? Hende mester ta di buena voluntad, anto paz lo reina den tur corazonnan.
Despues a sigi actuacion di gruponan Navideño. Na tur a tuma parti cinco grupo: Los Trupialitas; Los Caminantes; Trio Huasteca; Los Mix y Don Bosco. Tabata un cos di admira tanto e bon di organizacion como e bon actuacion di cada grupo individual. Esaki ta muestra cla, cu nos Isla ta progresando riba e tereno musical. Cu actuacion di e gruponan aqui, cu den algun luna di practica a duna resultado asina, nos por mira cuanto por ser haci mediante disciplina y perseveranza. Un palabra di elogio y felicitacion na tur e gruponan y dirigentenan.

E comedia aqui a ser ehecuta maravillosamente. Masha gustá tabata e canto di e Angelnan (nuebe) y e wardadornan (cuater). E salanan di Club Bonaireano tabata completamente yen y tur e presentenan a admira mashá e actuacion di e comediantenan. Premier cu clausura hobencita Joan Hart a recitá un bunita verso. Terminando e programa Presidente Moises Sint Jago a tuma palabra pa gradici na promer lugar Pastoor di San Nicolaas, van Baars kendetabata dis-

puesto pa a bin sera e aña cultural cu un Mensahe di Navidad. Tambe Sint Jago a gradici tur pa nan asistencia y un elogio na e gruponan navidenjo cu pa nan contribucion a haci e anochi aqui inolvidable. E programa aqui cual a resulta den un grandioso exito a worde organisa pa Sr. John Hart, kende ta encarga cu e programanan cultural di Club Bonaireano.